

15.

D. O. M.

# QUÆSTIO MEDICA,

*QUOD LIBETARIIS DISPUTATIONIBUS  
manè discutienda, in Scholis Medicorum, die Jovis nono mensis  
Februarii anni M. DCC. XXXVI.*

M. JACOBO-FRANCISCO VANDERMONDE,  
Doctore Medico, Præside.

*An infirmis à morbo viribus reparandis Gin Seng?*

I.

**V**IRIUM integritas, sanitatis signum & effectus. Imbecillitas, morbi symptomata. Non hujus semper causa eadem; hanc aliquando Plethora, Cacoehymia sæpius inducit, ab utràque virium imbecillitas. Quæ à Plethora, apud Medicos, vero nomine oppressio audit. Quæ à Cacoehymia, dissolutionem merito appellaveris. Cacoehymia sæpe à concretionem, interdum à dissolutionem; alterutra vitiet sanguinis crasim parum interest; ex utràque perit virium integritas & firmitudo quæ à solida inter & fluida reciprocando motu pendet. Hæc liquorum & vasorum perennis, aqua, lenisque agitatio, secretiones & excretiones absolvit, undè nec redundans, nec viciosum quid in corpore superstes. Secretionem hanc necessariam in primis agnosce, quæ ferriante aut remittente, morborum ingruit cohors. Diaphoresim intellige, hæc interclusa morborum, irrure iliadem qui dubitat, affectus rheumaticos exploret, in quibus ut plurimum nullam tum intimam, tum extimam partem, doloris proindeque læsionis immunem videas. Non aliam tot tamque gravium symptomatum causam, præter perspirationem imminutam, ratio & experientia commonstrant. Quid mirum! hæc viâ major excernendorum funditur copia, quam cætera, quot quot sunt, simul supplere valent incernicula! At undè tanta possit perverti functio forsitan quæviseris? quibus organis peragatur, perpende; hanc facile præcludi posse lubens fateberis. Adeo cutis spiracula numero infinita, per quæ succi nutritii residuum fecernitur sub formâ vaporis ita tenuis ut sensus fugiat, levi de causâ, venti, frigoris, humidæ tempestatis, occludi solent: nec mireris tantum succi nutritii ex partibus quibuslibet redundare, quid enim nutritio nisi partium deperditarum restauratio, aut nondum perfectis accretio? inde in adultorum ætate consistente, partibus non deperditis, nimium addere ope cibi & potus, grande nefas; hinc ad ætatem usque consistentem minus homo perspirat. Perspirationem eam habe legitimam, quæ; coctione ritè peractâ, omnia nutritioni supervacanea foras liberè amandat; at nisi coctione facili alimentorum, hanc obtineri credideris. Hinc ut ritè cedat, assumptorum tum quantitatis, tum qualitates semper habe rationem, alias citò corruet corporis æconomia, citò labascent vires propter imminutam diaphoresim, quam sola restituta coctio valet redintegrare.

I. I.

**V**IRIUM jactura vel alimonie defectu, vel nimio humorum utilium dispendio; vel pravâ ciborum coctione, vel sanguinis redundantia, provenit. Hæc vires potius oppressas quam exhaustas repræsentat, solâque liquidorum redundantium de tractione amovenda. Alia quævis deficientium adjectione dissipatur, quæ pravæ coctionis est effectus, diatrâ & remediis quæ coctionem juvant & restituunt curatur. Non eandem læsæ coctionis causam esse, imò sic diversam putes, ut sæpius, nisi Medico sagaci, vix innotescat; ideo eam curandi & anceps & diversa methodus. Imbecillitas ventriculi à fibrarum & glandularum laxitate orta, undè stomachalis saliva uberior diluitorque, ciborum massam ventriculo ingestam abluendo potius quam diluendo æ-

subigendo, coctionem pravam suppeditat. E contrario ventriculi fibræ atque glandulæ constrictæ nimis, parcius supplendo succum gastricum eumque crassiores, alimentorum massam neque dilutam satis neque subactam, diuturniori morâ acefcentem, crudam adhuc ad intestina provolvunt. Hepate malè affecto, bilis à sanguine non secreta, salivam ac succum digestivum inficit, coctionem & chylosin pervertit. Spirituum depauperatio, sive propter inedium diutius protractam, sive ob immodica corporis exercitia, seu propter animi diuturnum moreorem, seu propter humorum utilium nimium dispendium, coctionis læsæ non rara causa. Has prout diversas tollere causas arduum sanè, satisque sæpius Medico illarum effectus emendare. Illud verè dixeris remedium, quod à quavis causâ depravatæ coctioni restituendæ idoneum agnosces, quod coctionem juvando restituendoque, Diaphoresin resarciat integram, viresque imbecillas recreet.

## III.

人  
生

**GIN SENG** \* seu *Pe Tsi* primum à similitudine suppositâ cum effigie hominis, secundum verò ab innumeris ejus proprietatibus sortitur apud *Sinas* nomen. Inter trigesium-nonum & quadragesium-septimum borealis gradum, ponè stupendos *Sinarum* limites, apparet longa montium series, opacitate arborum & fecunditate graminum quibus operitur & circumdatur, hominibus quasi impervia. In collium devexitate, torrentium crepidine, circà rupes & diversos inter celsipes lignaque crescit salubris planta, nusquam in campis apertis, vallibus nec paludibus reperta: circiter mensem Aprilem germinat caulem simplicem, unius pedis altum, glabrum, ex rubro nigricantem, qui suprà medium suæ altitudinis, instar anemones, circumcingitur appollitis in orbem basibus pedunculorum, quorum singuli in extremo suo gerunt quinque folia in radios digesta, aut in speciem expansæ manûs, sibi inæqualia & tenuia, oblonga & acuminata, leviter dentata & obscurè virentia: caulis desinit in umbellam, cujuslibet radii extremo, unum modò florem gerentem, completum, regularem, polypetalum, ovario innascentem; ovarium hoc, quod calycem multis acuminibus coronat, fit bacca, primùm viridis, deindè alba, & tandem rubicunda, in quâ reperiuntur ut plurimum duo semina compressa, secta quasi in renis, vel fœmiciirculi formam, ita ut unita speciem cordis referant. Radix, calami scriptorii & ali-quandò digiti parvi crassitiem adæquat, non rarò bipartita, rugosa, subflavi coloris, fibris tenuibus prædita, & circumcircà nigris subtilissimis maculis variegata; à numero circularum successivis caulibus circumscriptorum, ejus statuitur ætas. Masti-cata dulcedinem non ingratam cum aliquali amaritie præ se fert, radicum liquiritiæ simul & petroselinæ gustum æmulans. *Sine* & *Tartari* eam magno apparatu & labore colligunt ineunte Vere & declinante Autumno, mundant attentè, radices lavant in decocto seminis Milii, & eas accuratè exsiccant suprà fumum ejusdem seminis in aquâ cocti, ut de flavo ejus participant colore; & ne carie humiditateve afficiantur, eas perfectè siccas, afflante Aquilone, in vasis æneis, lixivio elutis & cautè clausis recondunt. De minimis radicibus residuis consuevit extractum; folia autem tanquam *The* pro usu conservant. Aurelianam nostram Canadensem unam & eandem esse plantam, luculenter probant iidem altitudinis gradus, æquale solum, non impar montium positio, similis nemorum aspectus, & tandem inspectio pediculorum, foliorum, florum & fructuum. Si radix videatur dissimilis, quid mirum? nonne radix pastinacæ horten-sis caule & seminibus ornata, toto discrepat Cælo à pastinacâ culinæ iidem nondum præditâ? Colligatur Canadensis propriis anni temporibus, æquali metho-do exciccetur, pari cautione asservetur, nec aspectu, nec gustu, nec etiam virtute erit *Sinen-si* abimilis. Testes sunt *Sine* qui Canadensem *Canonem* nobiscum aspor-tatam genuinum *Gin Seng* subito agnovère: nec desunt qui proprietates *Sinen-si* æqui-parandas in selectiori experti sunt. Nullum in triplici regno remedium, seu à solâ naturâ, seu ab arte quantumvis soletter paratum, plantâ *Gin Seng* efficacius reperies, hæc coctionem juvat restituique, Diaphoresin resarciat integram viresque imbecillas recreat.

**M**EDICAMENTORUM vires experientia imprimis confirmat, quas à certis principiis dimanantes ex analysi Chymicâ judicaveris, sæpius errori obnoxias experimentis parebit; eadem chymicus ignis extorquet principia è plantâ eduli, quæ suppeditat planta toxicalis: nec semper saporî & odori nimium crede, saporem amygdalaceum refert genuinum scammonium quod summâ virtute pollet cathartica, dum amygdala in alimoniam cedit. Certa inest principiorum cujlibet mixti compages, è quâ exurgit virtus, quâ solutâ aut adulteratâ, nova nascitur proles, à nativâ sic degener, ut ipsi prorsus contrarios promat effectus. Mixtum ideò quale natura edidit, exhibe, ipsimet manda naturæ, & tibi secundum votisque consentaneos edet effectus. Quæ novus Orbis seu America nuper in Medicinâ ministravit medicamina, rei stabiliant argumentum. Cortex Peruvianus nullâ paratus arte, febris intermittens verum & nunquam laudandum satis remedium. Sima-rouba nuperrimè ad nos advectum, diarrhææ, dysenteriae, aliorum quorumvis remedium, quin & ipsiusmet Ipecacuanhæ virtutem eludentis, presentissimum, quotidiana declarat experientia, medicamen. Num sapor aut odor, num analysi Chymica, tantas tamque stupendas in hisce vegetalibus latentes indicavere virtutes? Cortex Peruvianus odoris inops saporem amarum atque stypticum exhibet. Sima-rouba nec odoris nec saporis aut tantummodò modicæ amaritiei dives. Nonne innumera vegetabilia eadem sensibus exhibent dotes, quas tamen utriusque viribus, non solum inferiores, at sæpius contrarias agnoveris. Undenam in his Americanis vegetabilibus virtutes? nisi in ipsorum nativo contextu, ventriculi fibras languidiores atque laxiores ad tonum revocante, hinc fibrarum restitutum robur, coctiones læsas redintegrando, secretiones ac præcipue Diaphoretum juvat. Sic in febrilibus intermittentibus, sic in diarrhæâ & dysenteria ad tonum restitute ventriculi ac intestinorum fibræ alimenta firmius retinendo atque subigendo, massam alimentorum comminunt; nec uberior & aqueosior è glandulis affluit succus, at stillando irrorat, unde genuina ingestorum coctio & redundantium excretio. A plantâ *Sinenfi* nec diversas nec minores obtinendi spes, si saporî credendum & odori: hic fragrantem etsi levem vim refert aromaticam; ille amaritiam dulcedine temperatam exhibet, salis essentialis, tantisper volatilis, partiumque sulphurearum resinolarumque signa & effectus, quorum consortio & amico fœdere, nervis & spiritibus recreandis, ut & fibrarum nimis laxatarum elasticitati restituendâ, aut tensarum nimis elateri relaxando, non impar. At quæ iisdem principiis gaudent, non eisdem semper sed & contrarios edunt effectus? Esto. Non in his eadem principiorum miscela, quam sola detegit experientia. At, inquires, ubinam, à quibus gentibus veritas accipienda? *Sinas, Tartaros, Timkinos, Japonenses* aliosque Asiaticos sub diverso Sole degentes consule, apud quos post hominum memoriam usus *Gin Seng* sic invaluit, ut cuilibet ferè morbo, vel tanquam therapeuticum, vel prophylacticum, vel saltem viribus refocillandis aptum, cuilibet ætati, sexui atque temperamento exhibeant. Non apud tot tamque diversas gentes, novitatis amor; imò antiquitatis, id est per sæculorum seriem comprobati remedii meretur encomium. Si viatoribus quædam habenda fides, quotquot qui hæc immensas peragraverunt regiones, ad summas laudes in Medicinâ plantam evehunt, nec de laudibus quas Asiatici huic radici tribuunt, detrahunt quicquam. Quoniam fundamento tantoperè decanteur, ab ipso-textu Sinenfi accipe. \* In diarrhæis, dysenteriis, ventriculi & intestinorum debilitate aut depravatione, sicuti in syncope, lipothymia, paralyxi, stuporibus & convulsionibus prodest: mirum in modum refocillat nimia venerè exhaustos homines à morbis vel acutioribus vel chronicis enervatis, nullum huic æquiparandum medicamentum: ubi post eruptionem fractis jam viribus, subsidunt variolæ, felici cum successu in largâ dosi propinatur: tandem repetitis vicibus, vires admodum debilitatas reficit, & mirificè restaurat, perspirationem auget, blando calore sentiam corpora perfundit, medullam in ossibus & totam artuum compagem ve-

\*  
本草綱目  
李時珍

PEN  
SAU  
KAN  
MOU  
LI  
TCHI  
SIN

» getat & confirmat: quin imò, addit idem textus, in agone jam constitutis, tale  
 » robur restituit, ut retardatâ morte, tempus & occasio eis supersit ad alia assumenda  
 » medicamenta, sepeque pristinam sanitatem recuperandam.

V.

QUIS tot celebratam laudibus radicem non veram panaceam crediderit? Quis non alia, quæ in Asiaticis regionibus natura producit medicamina, inutilia prorsus? Quis non incassâ Medicinæ leges, Medicique labores potius ad ingenii ornamentum quam ad scientiæ utilitatem, non prædicaverit? Erras, non minus quam aliud pharmacum, artis legibus & sagacis Medici judicio, subditam agnosce. Cortex Peruvianus, Ipecacuanha, Simarouba in ipsismet morbis, quibus experientiâ præcipue mederi compertum, non tamen innoxie ab Empiricis exhibentur. Minuet quoque famam *Gin Seng*, qui Medicinæ principiorum rudis, tam à suâ naturâ salubrem plantam temerariò largietur. Ab ipsismet *Sinensis* Medicis accipe quæ ad radicis usum hortari aut deterere debeant. » Gulosis atque *Omnopotis* parum proficua. In febribus malignis & epidemicis cum summâ cautione, & tantum remittente febre usurpanda; in phlogisticis, hæcticis atque suppurantibus, tanquam canopejus & angue fugienda. In hæmorrhagiis parce, nec nisi tibi prius cognita causâ: » In affectibus strumosis, scorbuticis atque venereis, incassum etsi innoxie tentabis: » at languidis aut caducis vires addere aut recreare, diuturnis animi mororibus & febribus hæcticis maceratis & exhaustis, opem ferere jueundam tutamque, prudentes adhibendo à scrupulo ad drachmam semissem, aquâ calidâ, horâ spatio infusam, » vel in pulvere, vel in extracto, vel si mavis aliis remediis admixtam, à granis decem ad sexaginta, & certis in casibus ultra, prout requirit necessitas. » Ex medicamenti simplicitate elucet virtus, quæ semper major, quò naturam propius amulatur. In re tam simplici tantam Energiam latere quid mirum? à principiorum legitimo & felici connubio cujuscumque mixti prodit virtus, quæ semper major, quò minus irretita crassis, viscidis aut terrenis partibus, aut adulterata aut obruta salibus: hinc vegetaliū tuta magis prout magis simplici amica naturæ, quàm mineralium familiâ; illudque medicamentum imprimis elige quod alimenti potius quàm Pharmaci genium redollet, quodque magis per insensibiles vias naturam sublevar, quàm expurgando debilitat.

Ergo infirmis à morbo viribus reparandis *Gin Seng*.

#### DOMINI DOCTORES DISPUTATURI.

M. Andreas-Josephus Seron.

M. Jacobus Tyant, à Regiâ Scientiarum Academiâ.

M. Petrus Afforty, Chirurgiæ Professor.

M. Thomas-Renatus Gaspier.

M. Petrus Maloët, Consiliarius & Medicus Regis ordinarius, nec non Domus Regiæ Invalidorum, Ducum & Militum Academiæ Scientiarum Regiæ Socius.

M. Claudius-Anthonius Renard.

M. Philippus Davier de Breuille, Dotariæ Hispaniarum Regiæ, Medicus perpetuo ordinarius.

M. Guillelmus de Magny.

M. Franciscus Bailly.

Proponebat Parisiis, LUCAS-AUGUSTINUS FOLLIOT DE SAINT VAST, San-Laudæus-Constantiensis, Baccal. Medicus.

A. R. S. H. 1736. à sextâ ad meridiem.